

Onna bal'a lene

Su le tsemîn kiè va dè Nôvronne a la kabâne Ranbê, sè treüve l'alpâdze dè Saye, onna bal'a moutagne, onna moutagne yô mi dè sin vin vatse moutâv'on tchui li tsôtin.

I l'a onna karanténe d'an, pou dè dzin pasâv'on pè le vayon kiè travêrse hla moutagne.

Pindin on maï d' ou, fazive talamin tsô, inô li, kè li bitche l' aviv'on pâ le kouerâdze dè parti dè lite pouo alâ brotâ; li bardjé dremiv'on to le dzo, su on lan din la tsavane u dézo li z' avintaï di beü.

On desandre, Fabiïn, le pâtre, s' è mètu a fire vreyé la bouoraïre, pè vè li dâvoueu z' eure dè l' apri denâ; u bè d' onna vouerbe, i s' è desidô a sè mètre a pou pri marnu, tan l' avive tsô; i lâse, su lui, kè le feüdâ dè kouê.

Kin l' âruve traï z' eure, dâvoueu dzevenète vegn'on te pâ tsôpou du lô dè la tsavane yô Fabiïn fazive le bure, li pouote a l' ê.

U bè d' onna vouerbe, son z' u su le pâ dè la porte é, adon, i djon u pâtre : Bondzo Mouseu ! No vegn'in dè Tsamouozon é l' è le premié kou kè no vèy'in sé tan biô chalè; n' anmouerâye bîn le vezetâ ! Dèvan kè Fabiïn l' use pouesu dere on mouo, li dâvoueu damouizel l' intr'on din la tsavane é sè mèt'on a mouezenâ parto. L' arâd'on li getse, li z' émene, li sahle a fremâdze, li frînzieü ... A on mouemin baya, i fon te pâ mene dè pasâ daraï le pâtre, pouo alâ vère la tseüdaïre. Fabiïn sè mè adon a vreyé avoui la bouoraïre é le tranbetsè pouo teti moutrâ u dâvoueu dzevene son dèvan mi pâ le daraï; l' a tan vrea din la tsavane é rekouolô kiè pouo fouerni l' akrotse onna metre é tsaï a kupèlè, li tsanbe in l' ê.

Li dâvoueu mouéne, kiè sè demandâv'on di onna vouerbe pouordèk le pâtre fazive tote hlè gôgne é vrèyeve tan dèvan leu, sè mèt'on a kafouolâ, a kafouolâ tînk' a sè plèyé in dou, kan l' on yu sin, kan l' on yu le kouozin Fabiïn marnu, min on kayon dézo le feüdâ.

Fôdrè mè pardonâ, leu di le pâtre; y' avive talamin tsô, vouaï, kè m' a falu vouotâ li z' âyon, pouo travayé.

Vouo z' ite to t' èskouozô, brâve mèsâdze, laï djon li dâvoueu dzevenète. Mi sin kiè l' a dè suir, l' è kiè no pinsâv'in pâ, kin no sin partaïte, vouaï matîn dè Tsamouozon, dè vère onna se bal'a lene din la tsavane dè Saye !

Michèl Rodjeu

Fîn mê 1982